

DEN AMBIENTE



Ay Dande a yega na bo porta
Ay Dande bendiciona Pueblo di Aruba

FESTIVAL DI DANDE DEDICA NA MING MADURO



Riba grafico Ming cu su 7 trofeonan di dande.



Riba grafico Tipico Arubano, d.r.p.d. Chinto Geerman, Theo Croes, Feli Geerman, Ming Maduro, Tom Croes, Elio Dania. Sinta: Edwin Kock y Mario Croes.

E tradicional festival di dande cu lo bay tuma lugar awe nochí den club Caiquetio, lo ta dedica na e gran musico Clemente Maduro mihor conoci como Ming.

Ming ta bin di un famia cu ta rico na herencia di dande, cual su welo Jan Pieter Maduro tabata un di e gran cantante di dande te na su edad respeta di 80 aña. Su ruman Toribio cu actualmente ta residencia na Hulanda tambe tabata un gran cantante di dande. Ming ta ruman di e popular manager di baseball Juan Maduro.

Cu su 11 aña e la cuminsa toca sonfania di boca pa un grupo cu e tempo nan-ey nan

no ta pone number, pasobra nan ta djis lanta un grupo pa core paranda di dande. Tabata su ruman Toribio cu tabata curashe cada bez pa e canta dande y e la dicidi di cuminsa canta dande na aña 1976.

Ademas di ta un musico di dande, Ming ta director, cantante y violista pa 11 aña di e popularísimo Mariachi Nacional. Na aña 1986 y '88 Ming a sabi di triunfa como rey di dande. Aña pasa e la perde pa un punto di e actual rey di dande Vicente Tromp. E no ta participa e aña aki pasobra e kier competi cu Vicente otro aña cu Dios kier.

Segun Ming cu e diferencia di e dande di antes y cu esun di awor ta cu antes e dande tabata e meta principal. E tradicion di e tempo nan ey tabata cu sin un dande nan no ta sinti e bendicion pa un aña nobo. Tambe cu antes e tradicion tabata asina fuerte cu


ora cu un famia ta di luto nan ta ricibi dande, local cu awendia no ta posibel.

Tempo cu fiestanan di club a cuminsa, e dande a cay masha hopi mes segun Ming. Pero gracias na Harry Croes cu a bin cu e idea fantastico na aña 1974 di organisa festivalnan di dande, cu awor e dande ta popular y asta a bira e fiesta tradicional atrobe. E ta sumamente contento cu nan a dedica e festival aki na su persona, y asina por a wordo reconoci como cantante y musico di dande. E ta haña cu mester cuminsa motiva e juventud e importancia di nos dande cu ta unico den Mundo, pasobra ta nan mester keda mantene nos tradicion di fin di aña.

Tabata un placer pa DEN AMBIENTE por a sostene e entrevista aki na cas di Ming,

sinta den su sala rondona cu trofeo y plaquette for di su exitoso logronan. Como musico y cantante di dande e la logra 7 trofeo, y cu mariachi 10 plaquette. Sin duda cu Ming ta un gran musico y cu tur rason e di 18 festival di dande ta dedica na su per-

sona. DEN AMBIENTE felicita MING pa e gran di awe cu e festival ta dedica na su persona y cu pa e aña mas e por sigui canta. DANDE a yega na bo porta AYNObE, ay DANDE BENDICIONA DEN AMBIENTE !!!



Riba grafico Harry Croes e incansable organisador di dande pa 18 aña dunando splicacion tocante e reglanan e gran festival di dande cu lo bay tuma lugar awe nochí den club Caiquetio. E festival aki e aña aki ta dedica na Ming Maduro.